

# SUFFRAGIUM CENSORIUM

IN CAUSA

## V. F. SEBASTIANI

AB APPARITIO  
PYRAUSTÆ VULGO DICTI.

FACTI SPECIES

*Sacro Theologorum Collegio proposita.*



**P**yrausta Vir eximiae virtutis, simplex, rectus, ac timens Deum, & recedens à malo: \* in Hispaniis natus, humili genere, honestis Parentibus, mediocris fortunæ: Puer pastendis gregibus, Adolescens agriculturæ deputatus: Junior servicio alieno mancipatus, varias expertus vicissitudines, à Deo tamen præventus, mirificè profecit de virtute in virtutem. Provecior ætate in novam Hispaniam solvit, ubi magna pollens industria, justis laboribus substantiam, remque familiarem adauxit. Amorem omnium sibi conciliavit, animi integritate, ingenuitate, atque generosæ indolis actibus, summam venerationem adeptus, per heroicæ virtutis specimina. Amore, & fide, pietateque in Deum maxima, conscientia optima præditus, castitatem,

A

vir.

virginitatemque adeò coluit, inter alias egregias dotes, ut jam tertio per Mulieres sibi à Diabolo paratas, ingentes insidias, in ipso juventutis flore eluserit. Quin immò de ipso Diabolo in foeminea specie sibi apparente, gratia Dei viriliter triumphavit. Oblatas aliquando egregias nuptias modestè rejectit. Postmodum penè sexagenarius, prudenter perpendens, non esse bonum hominem esse solum\*, sociam sibi querere cogitavit; talem quidem, uti dictitabat, cum qua, si possibile afferret, vivere liceret in casto, & virginali connubio, ad instar S. Patriarchæ Joseph cum Sanctissima Sponsa Virgine Deipara, ita ut jugum matrimonii, absque carnis tribulatione, serena pace sustinere valeret.

Annuit Deus ejus votis: nam honoratior quidam homo, hoc Pyrausta propositum affecturus, enixè rogavit, ut filiam suam sibi despondere dignaretur, ætatis tenellæ, dote pauperem, sed virtutum decore divitem, qualem ipse cupiebat; addens hoc Deo gratissimum futurum. Ei enim offerebat in conjugem, tantum ut sua protectione fulciret, & à periculis mundi, atque pudoris jactura ob pauperiem eriperet. Pyrausta divinæ voluntati addictissimus, & pietatis operibus, Dei nutu negotium peragi advertens; in Sponsam accepit Puellam, ea lege, ut ejus subveniret indigentia, & patrocinaretur pudori; sequeretur & rem suam familiarem, cura Sponsæ muniret. Erat enim tenella Sponsa Seniori Pyrausta, ætate, & innocentia, sicut filia; eam licitè nutrebat, & abundantius in cunctis aderat; excepto congressu matrimoniali; quem nec ipsa Sponsa petebat, nec appetere unquam ostendit. Sponsæ Sponsus castè abblandiebatur, illam in thalamo collocabat; verum ipse virtutis Vir, post pias preces, extra thalamum in terra juxta ipsam cubabat, castè, sanctèque cum ipsa vivendo. Invidens Diabolus tantæ virtuti, excitavit in Pyraustam Parentum Sponsæ persecutionem, qui ducti

cupi-

\* Gen. c. 2.

cupidine divitiarum ejus, videntes utrum filix non irascere ad hæredes eritendos; & scientes propositum Pyraustæ, ob quod Sponsam duxerat, non percipientes hoc fieri Dei; & virtutis amore; ipsum aggressi injuriis, quasi Sponsam, & jura conjugii sperneret, minantur ad iudices provocaturos, pro dirimendo conjugio, quatenus esset ad illud ineptus. Omnia æquanimiter toleravit Pyrausta, annis quidem provectior, sed viribus robustissimus, eisque respondit modestè, eorum filiam in Sponsam sibi junxisse, ad ipsam protegendam; & si accidisset, se præ illa diem ultimum claudere, eam ex assè instituturum hæredem, ut posset vitam degere ab omni necessitate liberam: cæterum se omni culpa carere, quia Sponsam non malè habebat, nec ab ea abhorrebat, ut ipsam fateretur. Verùm nec acquiescentibus illis, Deus amovit occasionem jurgiorum, ad æternam vitam vocata Sponsa, vix elapso anno conjugii.

Postmodum iniit Matrimonium secundum Pyraustæ, eodem proposito virginitatis, & castitatis, eisdem protestationibus: & in Sponsam assumpsit pauperculam paritèr, sed virtutibus excultam Puellam; quam ipsemet ob ejus pauperiem educaverat, & in sacro Puellarum Gynæceo, servandam tradiderat, & aluerat usque ad ætatem nuptiarum, quam offerentibus Parentibus desponsavit; cum qua eundem vitæ tenorem servavit; ut patuit ex testamento, quod gravi pressus infirmitate confecit; in eo ex conscientia declarans; Sponsam in sua virginitate relinquere, eo quod ipsam duxit in lociam, ad rei suæ familiaris custodiam, sui que curam, cum malè degeret solus; & ejus protectionem gereret, & suis facultatibus ipse inserviret. At postquam ab infirmitate convaleuit, cum novissent Parentes Sponsæ, vel ex testamento, vel ex suspitione, non tamen ex Sponsa, Pyraustam rem non habere cum illa, insurrexerunt contra illum, eadem cupidine hæreditatis, ut fecerant priores, & per semetipsos, ac per Confessarium Pyraustæ comminati sunt periculum conscientiar,

tiae, eo quia non incumberet beneficio prolis, cum sua Sponsa matrimonium exercendo; juxta Sacramenti, & Ecclesiae intentum; quae omnia Pyrausta tranquilla, & immutabili mente audiebat absque scrupulo, sciens certò certius, suam Sponsam tales non habere impulsus, & semet in conscientia securum. Et quidem secunda hæc Sponsa Pyraustam vocabat suum Patrem, etiam ante nuptias, & jure pro Patre habebat, quia ipsam amore Dei educaverat, & aluerat. Ipseque Pyrausta sicut filiam agnoscebat, ita ut non semel equitando, ante se in ulnis portaret ad quandam Matronam, quæ eam ministeria fœminea edoceret; & adeo innocenter se habebat, ut sæpius puerilibus visa sit ludis sese oblectari. Et hanc quibque sustulit Deus, post menses octo, ad sedandas turbas excitatas a Satana; & quia ad altiora virtutis, & perfectionis culmina, vellet Pyraustam sustollere, uti de facto fecit: cum Pyrausta tandem sæculo vale dixerit, ac distributis facultatibus pro Christo, & pauperibus, Religiosam vitam professus, propè centenarius diem clausit, plenus meritis, & mirandis operibus. Post mortem vero Sponsarum, Pyrausta gloriabundus in Domino, dicere solebat de Sponsis suis, se quasdam columbas ad Cœlum educasse lacte candidiores, Deo gratias plurimas agendo. Cum autem a quibusdam viris Religiosis interrogaretur, super contentione Parentum Sponsarum, respondit à Sponsis suis scire se, non exiisse tales querelas, neque Parentibus ullam causam dedisse talium turbarum; inde laudibus efferendo sinceritatem, & puritatem earum: Parentum potius incusabat hæreditatis capiendæ cupiditatem. Igitur


Quæritur à Sapientissimis Viris, & ornatissimis Virtutum Sectatoribus, An Pyrausta in his malè se gesserit? An potius heroicæ virtutis actus perfecerit?

5

# C E N S U R A

## THEOLOGI PUBLICI

*Ad examen unà cum aliis deputati.*

I.  Ecta atque perpensa diligenter Facti specie , qualis Sacro Collegio nostro scripto proposita est , difficultatis summam cò redactam video , num Pyrausta gesserit se prudenter , virtutisque excellentis actus perfecerit , dum concepto prius servandæ virginitatis sanctiori proposito , firmoque consilio , annos sexaginta jam natus , vegetus tamen & bene valens , viriumque ac sensuum integer , binis per vices puellis , ætate tenellis , matrimonio junctus est ; iisdemque , quoad ambæ vixerunt , familiariter pro licentia maritali , thalamo licet abstinens , blandiendo convixit .

Neque enim de rata gemini conjugii auctoritate , seu , quod aiunt , validitate quæri à Consultoribus video ; nùm fortè præmissum tenendæ virginitatis propositum obfuisse : cum illud potius , ex S. S. Patrum , Sacrorumque Canonum doctrina , pro certo ponatur , simplex servandæ virginitatis propositum substantiæ Matrimonii nihil officere . D. Aug. lib. 1. de Nuptiis , & Concupiscentia cap. 11. D. Thom. in 4. Sept. dist. 30. quæst. 2. art. 1. ; Alexander III. cap. *Comissum* , extra de *Sponsalibus* , & *Matrimonio* ; alii-que quos longo ordine recensere supervacaneum fuerit .

Ad id ergo , de quo unice Sacri Collegii nostri sententia quæritur , pro commisso mihi munere , statim accedens , Pyraustam imprudenter omnino fecisse pronuncio ;

atque adeo tantum abesse, ut heroicæ Virtutis, actus, puellas illas ducendo, ductisque convivendo, perfecerit, ut potius in multis reprehensione sit dignus.

II. Hujus mihi sententiæ primaria ratio hæc est. Quia imprudenter ille agit, ac temerè, qui constituto sibi fine pio præsertim, & arduo, media seligit, sin minus fini contraria, ac certè ab illo verisimilius abducencia; quæque illius consecutionem difficiliorem faciunt, novisque, ne obtineatur, difficultatibus implicat. Imprudentius multo agit, qui pericula illa studiosè quærit, & ambit, iisque sese volens, ac lubens obijcit, nulla aliundè necessitate pressus, ac ductus. Illud scilicet est amare periculum, labendique occasiones, data opera, ac de industria consecrari: quod inconsideratæ temeritatis est, & imprudentiæ, Sacrisque vetatur Literis, Ecclesiast. 3. *qui amat periculum peribit in ea*. Talis profectò [ iudicio quidem meo ] Pyrausta fuit, qui firmum servandæ virginittis propositum tenens, cum tamen vitæ statum, volens ac lubens, nullaque necessitate pressus, ingressus est; in quo dimittendi pil propositi proximo periculo quotidie verlabatur. Quid enim si in eo cum tenellis conjugibus familiari, intimoque convivu; in iis, quibus illis dicitur suppalpatu, blanditiis frequentissimis, carnales affectus enati illi essent? Quid si puellæ illæ novis, procedente ætate, ignibus accensæ, *carnisque tribulationem*, ut loquitur Apostolus, passæ, debitum petiissent? Tunc sanè aut à virginittis proposito recedendum illi fuisset, aut contra jura conjugii peccandum.

Neque valet si fortè dixeris, Pyraustam eo casu à definito virginittis proposito recessurum fuisse absque peccato, cum nullum virginittis votum emisisset: eundemque à meliori duntaxat bono, eoque plane libero abscissurum; atque adeò nihil mali, si debitum tunc aut peteret, aut redderet, admissurum. Nihil, inquam, ad  
excu-

excusationem id valet : quia tamen contra voti religionem , quod nullum erat , eo casu peccaturus non esset , erat tamen ex inconstancia , contra prudentiam peccaturus : quia bonum relicturus erat , quod sibi antea proposuerat , quod elegerat , sibi que ut finem constituerat . *Inconstancia siquidem illa , recessusque à bono proposito definito , ad imprudentiam pertinet ,* Judice Doctore Angelico 2. 2. q. 53. art. 5. Cujus ea ratio est : quia *recessus à bono proposito non consummatur , nisi per defectum rationis , quo fallitur in hoc , quod repudiat id , quod antea rectè acceptaverat .* Undè & hujusmodi mutatio propositi stultitiæ tribuitur Eccl. 27. *Stultus sicut Luna mutatur .*

III. Iis robur addit communis de Maria Josepho nubente sententia . Deiparam Virginem prudenter omnino , & citrà periculum amittendæ Virginitatis , Josepho nupsisse docent Patres , & cum iis Theologi fermè omnes ; quòd illa divina revelatione certò novisset , Josephum numquam ab ipsa debitum petiturum ; tùm quòd pari teneretur & ipse proposito castitatis ; tùm quòd illius votum quantocius concepturus esset ; ac tùm maximè , quòd Deus mentem ejus à petendo debito procul esset averſurus . De quo D. Th. in 3. Sent. dist. 30. q. 2. art. 1. *Beata Virgo antequam contraheret cum Josepho , fuit certificata divinitus , quod Joseph in simili proposito erat servanda Virginitatis : & ideo non se commisit periculo nubens .* Imprudenter itaque tenellas illas Puellas uxores duxisse Pyraustam oportet , seque in proximum amittendæ Virginitatis periculum coniecisse : quippe qui nullam hujusmodi , de puellis illis certitudinem haberet , quòd & pari virginitatis proposito tenerentur , & in eo immoræ futuræ essent , & nunquam essent conjugale debitum petituræ .

Nonnullos audivi qui dicerent : idcirco Deiparam Virginem Josepho nubentem certiore fieri debuisse , de constanti Josephi castitate , ne sese ipsa castitatis amittendæ peri-

periculo, nubendo committeret; quia nullum illi prælucebat exemplum contracti, post castitatis votum aut propositum, matrimonii: cum contra, Pyrausta exemplum hujusmodi, Mariæ scilicet, atque Josephi Matrimonium, jam tunc præ oculis haberet; in quod intendens ipse, securus ac tutus aleam jaceret. Quasi verò Pyraustam de constanti puellarum illarum castitate securum fecerit, eximium illud Virginis Josepho nubentis exemplum? Aut fortè à pari, ut aiunt, ratione, ita secum argumentari potuerit: nullum castitatis suæ periculum adiere Maria, & Josephus, mutuo contrahendo; itaque nec ego periculum ullum adibo, si binas illas puellas conjuges duxero? Id sibi si finxit animo Pyrausta, seque suasque conjuges cum Sponsis illis Sacratissimis contulit, audacissimus, & impudentissimus fuit. Quia ergo Virgo Deipara ideò prudenter omnino, & citrà castitatis amittendæ periculum, nupsit, Theologorum quidem judicio, propterea quod constantem Josephi castitatem divina revelatione cognoverit; [quidquid de prælucente, aut non prælucente hujusmodi conjugii exemplo, fingere lubeat] consequens profectò est, Pyraustam, qui nullam de constanti suarum conjugum castitate certitudinem habere poterat, quantumvis eximium illud Deiparæ Josepho nubentis exemplum illi præ oculis esset, imprudenter omnino Matrimonium iniisse; seque in patentissimum amittendæ castitatis periculum conjecisse.

IV. Ad lata jam sententiæ nostræ momenta, accedit & istud minimè contemnendum: quod Ecclesia vehementer optet, ut qui, post contractum legitimum Matrimonium, de consensu partium, virginitatem vovent, separentur ab invicem, nisi gravis obstat ratio, summaque necessitas; (toto titulo *de conversione Conjugatorum*) idque ob periculum violandæ virginitatis, in illo familiari, & conjugali convictu. Cujus infausta leguntur etiam in summis viris exempla: ac illud maxime Genebaldi Laudunensis Episcopi; quem cum uxor, quæ

con-



consentiente vitam Monasticam amplexus fuerat, ac deinde creatus Episcopus, frequentius visitaret, duas ex ea filios suscepit, ob idque à S. Remigio publicæ pænitentiae additus est. Quanto ergo magis optare Ecclesia censenda est, ut qui pio illo servandæ virginitatis proposito tenentur cælibes, à ducendis postmodum uxoribus, & à conjugali societate, intimoque convictu prorsus abstineant: ne & ipsi à pio, religiosoque proposito excidendi periculum adeant: cum facilius longè sit, cælibes firmum illud propositum antea tenentes, uxores non ducere, quàm qui duxerint, à convictu postea abstinere. Nisi illos aliundè ad ducendum, ductisque convivendum uxoribus, gravis aliqua ratio, summaque necessitas urgeat; qualis profectò nulla in Pyrausta inventa est.

Ea quidem necessitate pressi, ac boni etiam publici ratione ducti, nonnulli Principes viri, ac fœminæ, concepto prius virginitatis proposito, Matrimonium iniere; aut etiam, post nuncupatum in Matrimonio virginitatis votum, suis perinde conjugibus convixerunt; quin aut imprudenter egisse, aut Deum idcirco tentasse censeantur: quia illos in eum vitæ statum, atque ita in illud amittendæ, quam voverant, aut decreverant virginitatis, periculum, coniecit necessitas, non studiosa voluntas: eaque de causa Deum sibi ipsis eo in periculo constitutis adfuturum, piè, ac religiose sperare potuerunt. Non ità profectò Pyrausta, sed Deum apertè tentavit, dum servandæ ad obitum usque virginitatis suscepto consilio, fixoque proposito, ejusdem violandæ periculum adiit volens ac lubens, nulla uxores ducendi, iisdemque intimè convivendi, seu publica, seu privata necessitate compulsus. Atque ita nonnisi ex præsumptione adfuturam sibi, ad castitatis custodiam, Dei gratiam adpromittere potuit: quæ invitè quidem, innocentèrque periclitantibus adesse solet, non itidem periculum temerè advenientibus, & amantibus: facientibus quod in ipsis est,

est, ex Dei misericordia conceditur; aut officium deferentibus, sibi que præsidentibus; ex Dei iustitia denegatur.

Quæ etenim contrahendi Matrimonii rationes, Pyrausta fuisse dicuntur; curanda scilicet per Uxores res familiaris, illarum sublevanda inopia, tuendus à sæculi periculis illarum pudor; adeò futiles sunt, ut nihil magis; nullamque veram ducendarum per vices uxorum necessitatem, viro castitatis studiosissimo induxerunt. Cum alia meliori via, quàm inito Matrimonio procurare bona illa omnia de facili potuisset. Ut enim prædives erat Pyrausta, industrios, fidosque rerum suarum curatores, aut etiam si mallet proVectas ætate mulieres curatrices adsciscere sibi potuit; quæ eo longe melius officio defunctæ fuissent, quàm tenellæ illæ, & inexpertæ puellæ, curandæ illæ potius, juvandæque, quàm curaturæ & adjuturæ. Iisdem verò puellis pauperculis, ut fertur, ac de honore periclitantibus, dorem constituere potuit congruentem; ut vel viris bene moratis in matrimonio collocarentur, vel Christo cœlesti Sponso in Monasterio consecrarentur. Quæ autem producit ratio altera, quæ ad ducendas uxores Pyraustam impulerit: quod videlicet *perpendisset ille, bonum non esse hominem esse solum*, Genes. 2. non futilis modo est, verum etiam erronea, ad cælibatus, & Monachatus injuriam, à Calvinianis excogitata. Quasi verò de quibusvis hominibus dictum id esset à Deo, ac non potius de homine primo, in ipso mundi hujus exordio; ac de sexu virili, quem non expedit esse solum, ad commune generationis officium? Aut melius omnino non sit, cælibem vitam ducere, ad virginittatis custodiam, quàm uxoribus jungi, illisque convivere? Cum præsertim Apostolus dicat primæ ad Corinth. 7. *Nuptus & Viris bonum est, si sic permaneant sicut & ego.*

V. Accedunt & alia in Pyrausta imprudentis animi argumenta. Cum enim ex Apostoli doctrina, primæ ad Corinth. cap. 7. versu 9. *neutri Conjugum liceat cæstè vivere,*  
nisi

nisi ex alterius consensu : quod eundem Augustinus disertissime docet Epist. nunc 220, aliàs 70. ad Bonifacium Comitem, *Sine Uxoris consensu non continenter vivere viro non licet* : prudentia maximè postulabat, ut qui castè vivere in Matrimonio proposuerat, de conjugum quas ducebat, consensu, antequam contraheret, aliquomodo certus fieret, pati ab iis castitatis proposito petito, atque obsecro : quandoquidem consensum, postquam contraxisset, se ab illis obtenturum adpromittere sibi certò non poterat. Aliundè enim ex communi Theologorum, & Jurisperitorum Sententia, castitatis custodia, in ipso contractu Matrimoniali, in pactum expresse deduci non potest ; \* uti profectò nec Pyrausta deduxit, ea saltem in parte laudandus. Postulabat etiam Prudentia, ut qui castè in Matrimonio vivere constituerat, quod sine Uxorum consensu præstare nequibat, tales saltem in Matrimonium Uxores duceret, à quibus consensum illum obtinere multò certius posset : provecæ scilicet ætatis fœminas, quæ castitatem probassent ad multos annos ; ( quales olim in Diaconissas assumi juebant Canones ) à quibus minus illi de petitione debiti timendum fuisset ; quàm à puellis illis adolescentulis ; quæ licet pro tenera ætate simplices essent, ac verecundæ, dum ab ipso sunt ductæ ; timendum tamen erat, ne cum carne in iis crescerent desideria carnis ; quæ contrà in vetulis cum carne decrescunt.

Quid, quod ex ipsa nobis exhibita facti specie, non liquet, Pyraustam consensum illum suarum Conjugum, sine quo non licuit illi castè vivere, post contractas saltem nuptias obtinuisse. Quod enim aiunt aliqui, ut consensum tunc tandem obtentum ostendant, Conjuges scilicet ejus  
de.

\* D. Thom. in 3. Sent. dist. 28. quest. 1. art. 4. ad 3. Gregorius IX. Cap. Si conditiones, extra de conditionibus appositis in desponsatione, atque supra viginti, Laudati a Sanchezio lib. 5. de Matrim. dist. 10. §. 2. & a Lagnano lib. 3. tr. 10. par. 2. cap. 7. Coroll. 2. qui & iis hac in parte suffragantur.

debitum minimè petiſſe ; id inquam conſenſum liberum nequaquam evincit : quia quod in tam brevi temporis ſpatio debitum non petierint , ex puerili quadam erubeſcentia , reique veneræ ignoratione contigiſſe veriſimilius eſt , aut etiam ex timore reverentiæ in eum virum , quem non tam uti maritum , quàm uti patrem & dominum , ſuarumque fortunarum auctorem habebant : qui concepti dudum propoſiti tenaciſſimus , nunquam debitum poſtulare deſiniverat , ſed petendi onus totum devolverat in Uxores , ac etiam ne peterent , ſibiſque hæc in re morem gererent , hortabatur . Quod ſi fecit Pyrauſta bonus , uti feciſſe veriſimillimum eſt , ( quandoquidem non probatur oppoſitum ) non modo peccavit contra prudentiam , verum etiam contra juſtitiam : quia tunc contractum matrimoniale reddidit tenellis Conjugibus *onerofum* , judice Doctore Angelico in 4. Sent. diſt. 32. art. 4. ad 3. , *cum oporteret eas ſemper confuſionem petendi debiti ſubire* . Immodò vel ex hoc ſolo deliquit , ſi Conjuges ſuas à petendo debito nimis iſtanter avertit , eodem judice D. Th. ibidem art. 2. q. 1. ad. 2. *Non debet Vir uxorem avertere ne petat debitum , niſi propter aliquam rationabilem cauſam : & tunc non debet cum magna iſtantia averti , propter pericula imminentiæ* .

VI. Poſtremum , illudque minimè ſilendum in Pyrauſta imprudentis animi ſpecimen eſt : quod non ſatis honeſtum , ac decus ad ſpeciem tenuerit , ne ex gemino illo conjugio cæteri offenderentur . Quid enim in hominum æſtimatione tam indecorum , & indecens , quàm virum annos ſexaginta jam natum , tenellæ puellæ annos vix puto pubertatis ingreſſæ , matrimonio jungi ; ubi gravis ratio nulla deprehenditur , quæ hujusmodi nuptias cohoneſtet ? Quid tam inhoneſtum in hominum oculis , quàm virum ſexagenario majorem , ex priori uxore viduum , ad ſecundas nuptias , & quidem cum puella altera tenella , & adoleſcentula tranſvolare ? [ proh quàm tenellam fuiſſe illam oportet ,

ter, quam Pyrausta bonus, non equi sui tergo exciperet, sed ante se in ulnis equitando gestaret.!] Id scilicet risu & cachinnis excipi solet, tanquam intemperantis libidinis argumentum: quique hujusmodi nuptias prestant, deliri senes, insanis puellarum amoribus irretiti vulgò dicuntur. Quod omnes de Pyrausta eò facilius suspicari poterant, quod is mentem, animumque, quo eas adolescentulas senex duxerat, teneret occultum. Absit autem ut facinus offensionem non modicam habens, & ad honestatem minus benè compositum, heroicæ Virtutis actum dicere audeam, fidelibus ad publicam imitationem proponendum.

VII. At nonne, inquiunt aliqui, Josephum Patriarcham Sanctissimum imitari laudabile est: qui non modo Virginitatem in matrimonio coluit, sed & Adolescentulam volens ac lubens in matrimonium duxit, concepto prius colendæ virginitatis voto, aut certè suscepto consilio, fixoque proposito? Oh! qui quæso vos estis, qui omnia vel Divorum, vel Deiparæ, vel ipsius etiam Christi gesta, immò & omnia, singulaque gestorum adjuncta, à fidelibus exprimi laudabiliter posse existimatis; nec satis animadvertitis, sintne semper fideles eo in statu positi, iisque in circumstantiis constituti, quibus id prudenter, & laudabiliter facere queant, quod ii pro rerum suarum statu prudentissimè peregerunt? Sint, si superis placet, fideles aliqui, eodem ac Josephus ipse statu positi; sint paribus de Cœlo revelationibus illustrati, quibus de sua Sponsarumque ducendarum inviolabili virginitate sint certi; tunc sanè imitatio Josephi cum laude illis esse poterit: sin minus certi fuerint, imprudentissimè facient quod fecit ille prudentissimè.

Immo si liceat mihi pro Theologica libertate pronunciare quod sentio: est illa pietatis heteroclisis, & anomalia, velle Josephi matrimonium imitari, eoque sine  
arque

atque confidio conjugem docere, & quidem senellam, atque juvenculam, ne quid ad integram desit imitationem. Matrimonium quippè Josephi; ut simpliciter matrimonium fuit, corporumque conjunctio, excellentis, heroicæque virtutis actus per se non fuit, cujus imitatio summa in laude possit esse: quamquam infinita aliunde decora secum tulerit, quæ postquam mereantur admirationem, & cultum. Quare sanctioris propositi scopus in Pyrausta esse non debuit Josephi matrimonii imitatio, ut vel sic castitatem ejus etiam conjugalem imitaretur: sed Josephum castissimum laudabilius, prudentiusque imitatus esset liber, & cælebs, quàm Uxoribus junctus.

**Servanda in D. Josephi imitatione ea prudentiæ lex,** quam in ipsius Christi Domini imitatione eruditissimi Theologi ponunt; atque in his maximè Franciscus Suares lib. 9. *de lege Divina positiva* dictari cap. 14. Non est, inquit ille, prudentiæ opus, velle imitari Christum materialiter, ut sic dicam, in omnibus suis actibus: aliquis celebrando Pascha, manducaretur agnum Paschalem, quia ipse hoc fecit, & alia similia, quæ in nobis absurda planè essent. Sed imitandus est Christus formaliter, ut sic dicam, id est in obedientia proportionali: ut sicut ille servavit legem, quæ ad tempus illud pertinebat, ita nos legem nobis datam servamus. Quocirca vanam etiam superstitionem esse docet, velle Christum Dominum imitari, affectum aliquo vulnere, seu cicatrice, tum circumcisionis, tum affixionis manuum, ac pedum; ut in illo dolore, & passione quis Christo Domino conformetur: quia, inquit, conformitas illa in sola materiali, & corporali læsione, aut affectione, nullius virtutis honestatem habet, neque in aliquem honorem Christi cedit; & ita est cultus superstitiosus, & vanus. Pari itaque titulo, non erat D. Josephus viro calibi, liberoque, qualis Pyrausta tunc erat, materialiter, ut Suarezius loquitur, imitandus, in omnibus actibus suis, ac in ipso quoque eum Deipara

Vir-

Virgine matrimonio : quia nuda illa matrimonii imitatio , nullius virtutis honestatem habet , neque in aliquem Josephi honorem cedit ; sed erat illi Josephus *formaliter* imitandus , hoc est , in Virginali pudicitia , & quidem *proportionaliter* : ut sicut ille mentis , corporisque puritatem illibatam servavit in matrimonio , ita & iste , quantum Deus daret , servaret in castibatu . Quotquot aliam in Christi , Divorumque gestis imitandis , sequuntur normam , inconsulta , bona pace dicam , devotione , & anomala pietate ducuntur .

Adam obiter , non omnino ex Patrum sententia constare , quod aliis vulgo creditur : Josephum præmissa Virginitatis voto , aut etiam proposito ; ad nuptias accessisse . Negat id apertissime D. Augustinus lib. 5. contra Julianum cap. 12. ubi Josephum implendi Incarnationis Mysterii adhuc nescium , Mariam *in spem procreanda prole* duxisse conjugem docet ; nec nisi tertio post mense , Virginitatis voto se se obstrinxisse , dum divinam Utoris fecunditatem , monente Angelo intellexit : *Noli timere accipere Mariam conjugem tuam , quod enim in ea natum est de Spiritu Sancto est .* Luc. 1.

VIII. Videndum modò , quas afferant Pyraustæ Patroni imprudentiæ , & heteroclitis excusationes . Aiunt itaque primò , non imprudenter illam , ac temerè , amittendæ Virginitatis periculum adiisse ; imò nullum re ipsa fuisse periculum : propterea quod & de sua , & de puellarum quas ducebat , constanti castitate moraliter certus esset : de sua quidem , quia varias hujusmodi tentationes juvenis superaverat : de puellarum verò , quia eas ingenuas , verecundas , simplices , & minimè malas , antea noverat , & probaverat . At nã quæso Pyraustam insipientem , ac præfidentem , si se tam facilibus indiciis moraliter certum existimavit ? primò , quia in re venerea , ex una alterave tentatione feliciter superata , nemo de futuris pari foelicitate superandis , sit certus : cum tam multos quotidie videremus , qui primam , alteramve foelicitè superent , terciâ , quar-

quartave vincantur. Secundo, quia quas junior superaverat tentationes, perraræ fuerant, & casu fortuito duntaxat objectæ: in Matrimonio verò continua illi tentatio futura erat. Quis autem de continua tentatione superanda sibi sit certus, propterea quod transitoriam, ac veluti momentaneam superaverit? Tertio, quia priores illæ, e quibus emerferat tentationes, superari facilius poterant. Cum enim de re per se mala tentaretur, de habenda scilicet copula prorsus illicita; poterat plane vel ex ipsa facti turpitudine, vel ex studio tuendæ famæ, vel etiam curandæ valetudinis animo, ad resistendum excitari. In matrimonio autem, eò illi erat, acrior, obstinatio, subtiliorque tentatio subeunda; quòd nec jam de re turpi, nec per se mala, nec famæ noxia, nec salutis periculosa, sed de suo veluti jure capeffendo, tentandus esset; soloque ad resistendum, decretæ virginitatis amore excitari posset. Quis verò de graviori tentatione superanda sibi sit vel moraliter certus, quod leviozem superaverit? Quarto, quia tametsi puellas illas ingenuas, simplices, pudicas probasset antea; tales tamen futuras imposterum, sperare sibi certo non poterat: crescente cum annis malitia, auctisque cum carne desideriiis carnis, ac tum maximè matrimonio licitum illis faciente, quod antea erat illicitum.

IX. Addunt iidem illi Pyraustæ Patroni, necesse omninò non esse, hominem etiam solemniter voventem, securum esse, numquam se votum violaturum, ut prudenter vovere censetur: cum eam securitatem, ob continua vitæ pericula, habere homo non possit. Quantò minus ergò, subjungunt ii, necesse id non fuit, ut Pyrausta virginitatis propositum conciperet prudentissimè? Ità sanè, non est id necessarium: at non id quæritur in præsentia, an prudenter Pyrausta propositum castitatis initio conceperit: sed an eo jam concepto, matrimonium prudenter inierit? Porro tametsi necesse omninò non sit, hominem virginitatem prudenter voventem,



Item; aut etiam proponentem duntaxat, ac decernentem, de futura voti, aut propositi observantia, certum sibi esse, atque securum: id tamen prudentia postulat, ne in novum, graviusque amittendæ Virginitatis periculum, se se spontè, liberèque conijciat; quo sanè de voti, aut propositi observantia, minus adhuc certus fieret, minusque securus: neve cum vitæ statum lubens, & volens ingrediat, in quo devota, decretave Virginitas, in novum, graviusque, illudque continuum, ac penè inevitabile discrimen adducitur. Quid enim illud est aliud, quàm constituto sibi sine aliquo, pio prorsus, ac religioso, media sumere, à fine verisimilius abducentia? quod prudentiæ leges in primis vetant.

X. Opponunt loco tertio, atque in eo vim maximam ponunt, Pyraustam servandam Virginitatem proposuisse, non absolutè, sed *si possibile foret*: Atque ita nihil mali acturum illum, ac etiam propositum minimè violaturum, si occurrente aliqua insuperabili difficultate, à castitate deficeret: non enim, aiunt illi, esset impleta conditio.

Verùm, nec ob eam positam conditionem, Pyrausta ab imprudentiæ vitio excusatur. Sic enim debebat ex prudentia tale matrimonium inire, in quo custodia castitatis sibi maximè possibilis fieret, non in quo sibi fieret moraliter impossibilis, aut certè multo periculosior, ac difficilior; si ductæ uxores iusta vitæ spatia tenuissent. Debat ergò matrimonia inire cum vetulis, quæ per annos admodum multos virginitatem probassent, aut etiam cum provectæ ætatis viduis; à quibus minus ipsi periculum fuisset, quàm à puellis illis adolescentulis; quæ licet pro tenera illorum ætate simplices tunc essent, ac verecundæ; crescente tamen ætate futurum erat, ut in eis malitia cresceret, & cum carne crescerent desideria carnis, quæ contra in vetulis decrescere solent, ac paulatim extinguuntur. Debat etiam honesti speciem contrahendo tenere; ne

cæteri ex illa tam dispari Conjugum ætate offenderentur : quam utique publicam offensionem, provestæ ætatis uxores ducendo, devitasset. Debebat, ut antea diximus, (quibusvis tandem conjugibus jungi vellet) non antea matrimonium inire, quam simile castitatis propositum ab iisdem obtinuisset : ut vel sic de illarum ad servandam castitatem assensu, fieret aliquanto securior. Cum alterutri conjugum sine alterius assensu castè vivere impossibile sit; secundæ Cor. 7. v. 5. Sed & aliunde Pyraustam, sua illa conditione nihil obstante, imprudentissimum habeo, sicque palam ostendo.

Certè quotquot se aliquid facturos vovent, aut etiam simpliciter decernunt, *si possibile fuerit*; nisi derisorie proponant, aut voveant, ea ipsa conditione, casus duntaxat excipere intendunt, *impossibilitatis*, aliunde fortassis orituræ; non *impossibilitatis*, quam sibi ipsis ex imprudentia, aut ex malitia procurabunt. Uti plane qui vovet se professurum in religione, *si possibile fuerit*, excludit per hujusmodi conditionem, casum impossibilitatis profitendi; si quæ fortè oriatur aliunde, E. G. ex repugnantia Monachorum, qui eum fortè ad professionem recipere nolint; non casum impossibilitatis, ex ipsiusmet Voventis improbitate, atque astutia orituræ: ut si de industria pravos mores per annum probationis exhibeat, ut hac ipsa de causa ad professionem admitti non possit. Tunc enim si ob hujusmodi impossibilitatem, sibi de industria procuratam, non recipiatur ad professionem, non censetur concepto voto fastecisse, quod non sit impleta conditio, *si possibile fuerit*; quia de ea impossibilitate non est intelligenda conditio, quæ se voverat in religione professurum. Jam sic est in casu Pyraustæ. Proposuit ille quidem castitatem in Matrimonio servare, *si possibile foret*: at quæ illi aborta est servandæ castitatis moralis impossibilitas [maximè si puellæ illæ præcipiti casu sublata non essent] ab ipso Pyrausta de indu-

industria procurata est; quippe qui puellis semel, iterumque matrimonio jungi voluit, illis intimè convivere, ac suppalpari; potius quàm alterum, de quo diximus, matrimonii genus inire, quod paucioribus multò periculis fuisset obnoxium. Non itaque adjecta conditio, *si possibile fuerit*, Pyraustæ imprudentiam excusat, sed auget potius; cum eam sibi moralem impossibilitatem, de industria procuraverit. Annon quæso nugacem illum, qui facturum se aliquid promitteret, *si possibile foret*; ac tum allaboraret, ut ne possibile fieret?

XI. Opponunt illi præterea, nulli se periculo commisisse Pyraustam, puellas illas ducendo in matrimonium: quia si debitum petiissent, potuisset ille, concepti propositi tenacissimus, de statu religioso deliberare, atque ita matrimonium solvere, juxta Ecclesiæ Canones, qui id conjugibus licitum faciunt, cap. *ex publico*, extra *de conversione conjugatorum*. Egregium sane inventum! At non quid Pyrausta facere jure posset, ad castitatis custodiam, expendimus hic, sed quod facere constituerat, examinamus. Undè autem habent illi, hoc Pyraustæ fuisse consilium, solvendi scilicet matrimonii, ad primam debiti petitionem, emissam in Monasterio religiosa professione? Undè habent, Pyraustam virum prorsus ignarum, & illiteratum, Ecclesiæ novisse Canones, qui eam conjugii solutionem, ante habitam copulam, licitam conjugibus faciunt? Immo illud ex opposito constat apertè, nec id intendisse Pyraustam, quod illi affingitur, nec intendere potuisse, nisi secum ipse pugnalset. Cum enim propositum illi esset, castitatem in matrimonio servare, ad Divi Josephi imitationem; qui quæso matrimonium solvere cogitasset, ad custodiam castitatis? sic enim non servasset eam in matrimonio, sed extra matrimonium, & longè à Divi Josephi exemplo, quod æmulari constituerat, abscississet.

Quid quod non desunt Theologi ; Juriumque perit ; qui eam solvendi Matrimonii facultatem , novis duntaxat conjugibus concessam doceant , primo bimestri , à contracto matrimonio , non à petitione debiti computando . Si sic est , nulla Pyraustæ patuisset via , servandæ quam proposuerat castitatis ; si ductæ puellæ , post elapsum duntaxat bimestre , debitum petiissent .

Quid etiam , quod summi Theologi docent , inter quos Franciscus Suares tract. 6. de voto cap. 9. *Nec honestum esse , nec rationi consentaneum contrahere matrimonium , seu fidem Matrimonii dare , animo non consummandi , sed transeundi ad meliorem statum Religionis : maxime si id fiat ab uno contrahentium , ignorante altero , & bonæ fide contrahente : tum quia sic videtur fieri aliqua injuria conjugis , estque in hoc aliquis deceptionis modus : tum quia sic constituitur homo in gravi periculo , mutandi hujusmodi intentionem , & permanendi in eo statu matrimoniali , quem ingressus est .* Qui ergo Pyraustæ eam mentem affingunt , dum Puellis matrimonii fidem dedit , ut eum prudentem , & benè cautum ostendant , inhonestum , Suaresio Judice , faciunt , ac minus æquum , qui puellis illuserit , & injuriam irrogarit . Neque illi ulla ratione suffragatur viri hujus exemplum , qui , ut est in cap. *commissum extra de sponsalibus , & Matrimonio* , Matrimonium , suadente Alexandro III. contraxit , *ad frugem melioris vitæ transire suspirans* , atque ità destinata jam voluntate , Religionis subinde profitendæ . Is enim Matrimonium fidem sincero prorsus animo dederat , ac etiam juramento firmaverat , nihil tunc de statu religioso amplectendo omninò cogitans ; eamque subindè duntaxat Religionem ingrediendi mentem conceperat , post jurata , fide bona , sinceroque animo , sponsalia : unde ad servandam juramenti religionem , matrimonium contrahere jussus est . Pyrausta e contrario , ea mente , eoque consilio matrimonii fidem dedisse , jam dicitur ; ut si debitum peteretur , de profitenda reli-

gione

gione deliberaret : quare conjugibus , quibuscum nullo pacto convenerat , illuisse vincitur .

Sed etsi ea arte , atque consilio , quod illi libenter as-  
singunt , iis periculis occurrisset , quæ illi poterant obve-  
nire , ex parte uxoris debitum petituræ : non tamen iis pe-  
riculis occurrisset , quæ illi ipsi , ex propriæ carnis infirmi-  
tate , poterant aboriri . Quid enim si implemet , in eo fami-  
liari convictu cum tenellis conjugibus , carnis desideria  
concepisset ? tunc sane non de solvendo , sed de consum-  
mando matrimonio cogitasset , atque ita à proposito re-  
cessisset .

Effugium subinde quærunt , ut rationem ex D. Tho-  
petitam elidant , qui Virginem idèò nulli se periculo com-  
mitisse nubendo , docet , quia antequam contraheret cum  
Josepho , *fuit certificata divinitus , quod Joseph in simili pro-  
posito erat . . . . , & quod actus conjugalis , numquam sequi  
deberet* : aiuntque , Virginem ea quidem eguisse certitu-  
dine , quia votum emiserat ; ea tamen non eguisse Pyrau-  
stam , quia propositum tantum conceperat . Verum non  
satis observant , D. Thomam , tum ibi , tum alibi *sæpe* ,  
in ea Magistri sententiarum , Gratiani , aliorumque Theo-  
logorum esse sententia , Virginem tunc quoque dum nu-  
pfit , non nisi Virginitatis propositum habuisse , votumque  
duntaxat postea concepisse ; & tamen huiusmodi certitu-  
dinem , in ea , ut sine periculo contraheret , posuisse . Sed  
age , votum jam tunc emisisse ponamus : non idèò tamen  
argumentum à me ex D. Thoma petatum eliditur : quia  
si ea certitudo desideratur à D. Thoma , ut castitatis amit-  
tendæ periculum deviretur , Pyrausta quantumvis solo  
proposito obligatus , in eo certè periculo versabatur ;  
cum nullam huiusmodi , de suis conjugibus certitudinem  
haberet .

XII. Agunt ultimò tandem Pyraustæ Patroni , nonnullis  
exemplis , ut illum ab imprudentiæ vitio utcumque excu-  
sent .

sent. Heroicæ virtutis homines, inquit illi; majora interdum adire pericula, quam quæ Pyrausta puellas illas ducendo subjerit; quia idcirco imprudentiæ arguantur. Martyres interdum Tyrannos ad sævendum provocarunt; in supplicia, ignesque ruerunt; bestias quibus obiecti fuerant, vi adegere, atque in seipsos concitarunt; carnifices animarunt; aliaque id genus sunt aggressi, quæ à prudentiæ regulis abscedere videbantur. Egregiè profectò, & appositè, ad præsens, quod hic expendimus, Pyrausta conjugium! Quasi verò idem fortasse sit, periculum adire vitæ pro Christo Domino profundendæ, quod utique fecere Martyres, ac castitatis post conceptum propositum violandæ; quod Pyrausta fecit imprudens? Sed age, sit ita: quam dispar est aliundè Pyraustæ, & Martyrum ratio! Adibant illi vitæ pericula prudentissimè, quia id tutandæ fidei honos postulabat; ne pusillo, abjectoque animo ferre pro Christo supplicia viderentur: Pyrausta periculum adit imprudenter, qui nulla, ut id ageret, necessitate dacebatur, suoque duntaxat genio serviebat. Si quid etiam contra communes prudentiæ leges tentarunt Martyres, id peculiari Spiritus Sancti asitu, factum credere, non modo possumus, sed debemus: quia uti sancti, divinoque spiritu acti, nobis ab Ecclesia proponuntur: Pyrausta e contrario, si quid à communibus prudentiæ legibus abhorrens aggressus est; non perinde peculiari Spiritus Sancti impulsu factum credere tenemur, nisi certis aliunde documentis demonstretur: quia necdum publicum habet, & irrefragabile sanctitatis testimonium; necdum illum Divis adscripsit Ecclesia, & divino spiritu ductum pronuntiavit; sed an sit Altaribus admovendus inquiritur.

Diva Theresia, cujus etiam exemplum nobis obtrahitur, quòd votum conceperit longè magis arduum, [ de eo semper faciendo, quod è majori Dei gloria foret ] nec tamen ob id arguitur imprudentiæ; perperam ad Pyraustæ

excu-

excusationem in secessum inducitur. Cum nec ego Pyraustam inuensem, quod propositum conceperit arduum, ac difficile; sed quod eo concepto, ea selegerit media, quæ eundem ab implendo proposito, verissimilius abducerent, novisque periculis implicarent; quod protecto Diva Theresia non fecit.

Cætera, quæ ad Pyraustæ excusationem, jactantur exempla, servatæ in matrimonio castitatis, nihil ad præsens institutum omnino valent. Non enim Pyraustam minus prudentem fuisse dico, quod castitatem in matrimonio servavit, aut etiam servare, antequam contraheret, proposuerit: sed quod eo concepto castitatis proposito, nulla necessitate pressus, ac ductus, volens, ac lubens Matrimonium inierit; atque ita in præsentissimum deferendi propositi periculum, se sponte conjecerit. Divus Henricus verò, & Divus Eduardus, alique, qui castitatem in matrimonio coluerunt, eandem antequam contraherent, minimè voverant, aut statuerant; sed contracto jam Matrimonio, novo veluti pacto cum conjugibus inito, castitatem coluerunt: quod nemo negaverit esse licitum, atque laudabile. Diva Pulcheria Imperatrix, quæ castitatem diu ante quàm nuberet proposuerat, aut etiam voverat, matrimonium non nisi necessitate pressa contraxit, ex commodi publici ratione; quod ita necessitas temporis exigeret, ut conjugis titulo Marcianum, pro summo Ecclesiæ bono, eveberet ad imperium; uti Baronius observat in Annalibus, ad annum 450. Diva quoque Cæcilia, quæ post devotam Deo Virginitatem nupsit Valeriano, invita prorsus, & contra suam voluntatem in matrimonium non tam data, quàm tracta est; eratque (quod potissimum est hac in parte,) de inviolabili sua Virginitate secunda; cum in Angelis tutela esset, qua Virginitatem ejus custodires. Diva Dalphina, quæ Elzeario Comiti, post conceptum Virginitatis propositum, nupsit, ad Matrimonium accessit invi-

ra, atque ex obedientia, quam parentibus, & Carolo II. Jerosolymorum, & Sicilia Regi deberet, adducta: ut vitæ illius Auctor scribit, apud Surium, ad diem Septembris 27. cap. 5. Quodque notandum est magis, servandæ virginitatis propositum, non nisi post contracta sponsalia conceperat: atque ita ex tenendæ fidei necessitate, matrimonium inire compulsa est. Quod idem de eo dicendum venit, de quo sermo est in cap. *commissum*, extra de *Sponsalibus*, & *matrimonio*, cui Alexander III tutius esse respondit, contrahere matrimonium, post susceptum *melioris vitæ* consilium. Is enim consilium illud vitæ melioris, seu castitatis custodiendæ, conceperat, post contracta, ac etiam post jurata sponsalia: unde ad servandam juramenti fidem, congruum, ne dicam necessarium illi fuit contrahere matrimonium. Pyrausta ex adverso, suum illud propositum, diu ante contracta sponsalia, conceperat: atque ita nulla necessitate pressus, ac ductus, adeoque & imprudenter bina illa iniit matrimonia.

XIII. Iis omnibus præclusis effugiis, eversisque momentis, quibus Pyraustæ imprudentiam excusare nonnulli adnituntur; unus tandem superest, qui ab iis possit obtendi, atque ut inaudio, reipsa ab iis obtenditur, peculiaris afflatus Spiritus Sancti; quo motus, ductusque Pyrausta ea matrimonia contraxerit; ut vel sic, à violatis prudentiæ legibus excusetur. Spiritus, inquiunt illi, ubi vult spirat, hominemque quandoque, præter communes prudentiæ leges ducit, ac dirigit, ex prudentiæ scilicet supernaturalis, atque infusæ dictamine: quo certe modo Sanctos nonnullos à Spiritu Sancto afflatos, directos, ac ductos Historiæ produnt. Bellè scilicet ad excusationem excogitatum! verum cum Pyrausta certum, & authenticum sanctitatis testimonium nondum habeat; profecto nisi certis aliunde documentis evicerint, afflatum illum peculiarem Spiritus Sancti illi adfuisse; eundemque prudentia supernaturali,



turali, atque infusa [ quod paucorum admodum privilegium est ] donatum fuisse demonstraverint ; perperam omnino jactatur, ac fingitur . Cum id potius quæraturnobis , an in facto adeo inusitato , atque insolito , à Spiritu Sancto reipsa sit ductus , ut Divorum fastis possit adscribi , & tamquam hæroicæ virtutis exemplar universo Orbi imitandum proponi . Quid porro tam absonum , quàm ad casus propositi solutionem , id pro certo ponere , quod maximè quæritur in præsentia ? donec ergo Pyraustam Divorum fastis adscripserit Ecclesia , de tota ejus agendi , vivendique ratione , ex communis prudentiæ regulis nobis est judicandum , nec peculiaris ille Spiritus Sancti afflatus temerè confingendus : Sanctitas probanda nobis est ex operibus , non ex præsumptione Sanctitatis , opera approbanda , vel excusanda .

Secundum has leges , in Sacra Rituum Congregatione judicari solitum esse , dum de Divis in canonem referendis quæstio vertitur , testatur Eminentissimus Cardinalis Azolinus , in Voto ab ipsomet in Sacra Congregatione pronunciato , dum de Roberti Bellarmini inter Beatos referendi hæroicis virtutibus ageretur . Cum enim Bellarmino inanis gloriæ superbæque jactantiæ vitium abijceretur , quòd in publica concione Caput habita , uti & in ipsius vita ab eodem descripta , non pauca ad sui laudem dixisset , atque scripsisset ; ejusque patroni ad excusationem reponerent , potuisse Bellarminum peculiari quodam afflatu Spiritus Sancti , in sui ipsius laudes effundi ; cùm & Paulus Apostolus , de suis interdum laudibus magnificè dixerit , in datis præsertim ad Corinthios Epistolis ; officiolam excusationem , ita rejicit Vir Eminentissimus : *Quello che troviamo di S. Paolo, & d' altri Santi, che ò crediamo per fede essere Santi, confirmati in grazia, & sono già canonizzati, dobbiamo interpretarlo in bene, ancorche paia difetto, perche non può ingannare la Scrittura, nè la Chiesa. Ma di quelli,*  
de

*de quali pende sub Iudice l'Esame delle virtù, la presunzione è sempre pro natura: e tutti gli atti, che mostrano umanità, che è il loro principio naturale, sono giudicati difettuosi; altrimenti tutto anderà al rovescio. Perché de Santi già fatti, abbiamo da credere, che hanno operato bene, perché si sa che sono Santi: ma di quelli che cerchiamo dall'opera se siano Santi, bisogna che l'opere siano tali, che non solo escludano il difetto, ma provino la perfezione; Altrimenti si sconvolge tutto, ed è un pigliare la conclusione dell'argomento per provare le premesse. Ita vir summus: cujus ego acre iudicium Pyraustæ Patronis pensandum relinquo, ut intelligant, non esse de Pyraustæ matrimonio, ex Sanctitatis ejus, peculiarisve, qui illi affulserit Spiritus Sancti afflatus, præjudiciis judicandum; sed hæc ipsa, ut rectè judicetur, præjudicia esse omnium primò exuenda, ac deponenda.*

**XIV.** *Nec me movet, quod facta à Pyrausta in matrimonio castitatis periclitatio; eidem ut fertur, feliciter cesserit; illibatamque virginitatem, ut proposuerat, eum suis illis conjugibus reipsa servavit; debito conjugali neutra ex parte, vel petito, vel reddito. Quasi verò colligere inde liceat, prudenter contraxisse Pyraustam; ipsumque Spiritum Sanctum habuisse conjugiorum suorum consiliatorem? Non enim ex eventu, sed ex communibus legibus, rectoque dictamine, de consiliorum, gestorumque æquitate, atque integritate judicandum est: nec quid præter legem, & usum acciderit, sed quid verisimilius evenire debuerit, attendendum. Cum aliquos videamus, per iniqua, pessimaque consilia, ad prosperum exitum, felici quadam audacia, casuque fortuito pervenisse; ac in ipso etiam illicito, frequentique cum puellis accubitu, continentiam tenuisse: (ut de Roberto ab Arbrissello scribunt aliqui) quos tamen ob id unum, quod illis prosperè cesserit alea, nemo vel prudentiæ laude conspicuos, vel divino Spiritu, ut id agerent, afflatus pronuntiaverit.*

*Et illa, inquit Cardinalis Azolinus in laudato jam Vo-  
to, Sacrorum Rituum certa lex, ubi de virorum inter Di-  
vos referendorum heroicis virtutibus queritur, ut quæ ge-  
sta secundum naturam evenire absolute potuerunt, secun-  
dum naturam evenisse reipsa judicentur, non miraculo, pec-  
culiarique Spiritus Sancti virtuti deputentur. Tutto si deve  
presumere prima che il miracolo sia approvato, secondo li princi-  
pi; e lo stile della Sacra Congregazione: massimamente, quan-  
do l'azione, alla quale v'è unito il fatto preteso miracoloso, è  
in se stessa di difetto, è di scandalo. . . . il fatto non si deve  
credere soprannaturale, se non quando la necessità delle prove con-  
cludenti costringe a farlo, & il Giudice è obbligato a credere, che  
proceda piuttosto da ogn'altra causa naturale, ed anco diabolica,  
che da miracolo. Quid porro tam secundum naturam con-  
tingere potuit, quam ut tenellæ conjuges, brevi illo  
temporis spatio, quo Pyrausta in matrimonio junctæ sunt;  
[ prima enim intra annum, altera intra menses octo, e  
vivis excessere ] à petendo debito abstinerent, omnem-  
que Pyraustæ tenendi propositi locum relinquerent? Per-  
peram ergo prosperum illum eventum miraculo deputant  
aliqui; ut inde colligant, Pyraustam non imprudenter,  
sed affluente, atque dictante Spiritu Sancto, sua illa ma-  
trimonia contraxisse.*

*Sed & illa ipsa veri nominis miracula, quæ ab eo  
parata dicuntur, necdum sunt ab Ecclesia solemniter ap-  
probata; ut fidem illis teneamur adjungere: quin etiam  
si probata fuissent, Pyraustam ut summe virum justum,  
ac sanctum evincerent; non singula illius gesta factaque,  
sancta & justa, atque ex prudentia profecta demonstra-  
rent. Cum & Sancti ipsi miraculis illustres, suos quoque  
noveos habuerint, pro quibus eluendis poenitentiam age-  
rent, Deoque non secus ac nos quotidie dicerent, *dimitte  
nobis debita nostra*. Aliàs Petri Apostoli simulationem, ob-  
quam a D. Paulo reprehensus est, [ ad Gal. 2. ] piam,  
pru-*

prudentem, actumque virtutis herosæ liceret dicere, quod & ille miraculorum gloria clarissimus fuerit.

XV. Quapropter ut cuncta concludam: donec Pyraustam Divorum fastis adscripserit Sancta Mater Ecclesia, nosque de illo meliora sentire jusserit; totam ejus agendirationem, utpote communibus prudentiæ legibus repugnantem, probare omnino non possum. Pyraustam temerè prorsus, imprudenterque fecisse censeo, Deumque tentasse; dum concepto pridem servandæ virginitatis sanctiori proposito, nulla certe necessitate ductus, provecta licet ætate, sed bene valenti, ac vegeta, virium ac sensuum integer, binis per vices puellis, iisque tenellis matrimonio junctus est; illisque, quoad ambæ vixerunt, familiariter, ac pro licentia maritali, thalamo licet abstinens, blandiendo convixit.

XVI. Cæterum hoc meo, ad propositam de facto Pyraustæ quæstionem, dato responso, nihil, aut certè parum à Theologorum Salmanticensium, & Parisiensium judiciis dissideo; si hæc paulo penitius perpendantur. Theologi quippe Salmanticenses, ut ex illorum responso liquet aperte, de valido duntaxat, rectoque secundum Canones Pyraustæ Matrimonio interrogati, de hoc quoque duntaxat affirmatè respondent: quod & ego, uti rem secundum Canones compertissimam, sub ipsum statim initium, ulterò citròque concessi. De prudentia verò Pyraustæ in matrimonio contrahendo, deque exercitiis eo in negotio virtutibus heroicis, quod hic unum expendi, ne verbum quidem habuere, quo mentem suam, sententiamque significarent. Theologi verò Parisienses, sique pauculi, (nec enim totius Theologicæ Facultatis judicium circumfertur, sed septem duntaxat Magistrorum, in consultationem adhibitorum) ad primam propositæ sibi quæstionis partem, *An rectè valideque Pyrausta contraxerit*, affirmatè respondent; modò tamen, ut aiunt, perpetuæ virginitatis propositum, *in pa-*  
*stum*